

Kerwespruch

bun

Kinsteere

1987



Ich kind Eich o wie's immer wor,  
die scheenste Zeit vum gonze Johr.  
Wos honn mer gedicht unn gefleht,  
bis des Sprichje endlich steht.  
So isses halt, Ihr liewe Kinsteerer,  
de Ofang vum Spruch werd aach immer schwerer.  
Moi Vorgänger erzählte do vun ganz bestimmte Düfte,  
bei dene sich Vöjel treffe in de Lüfte,  
vun Weize-, Rogge-, Haferkern,  
die in irgendwelche Scheiern derrn.  
Unn wie jed Johr, ich konn's bald nemmer here,  
leije die Zuckerriewe in Gere.  
Doch Gott soi Dank konn mer's aach dies wirrer hern,  
es singe paar vun dene Bärn  
laut unn falsch kurz unnerm Moa:  
Kinsteerer Kerb is wirrer do !  
Unn wer's noch net begriffe hot,  
dem sage mer es folgend Wort :  
Dut de Äppelwoi in de Fässer verwese,  
is Kinsteerer Kerb längst schun gewese

Drum Kellner schenk die Gläser voll Woi,  
Kinsteerer Kerb soll unser soi !



Der große Tach des Matthias Rust  
bracht em hinnerher en Haufe Frust.  
Er dacht, er wär de Rote Baron,  
schwingt sich in Soi Chessna unn peest nach Oste davon.  
Als wie wenn er sagt: "Ich fähr zu moim Spatz",  
fliegt er gonz frech uff de Rote Platz.  
Mit em Friede in Moskau wors natierlich passiert  
unn es Militär hot gewaltische Rüffel kassiert.  
Es KaGeBe hot em Rust glei ins Kittsche gesperrt  
unn nach longe Verhern vor de Kadi gezerrt.  
Er sagt, er wollt für de Friede demonstriern  
unn iwwer des Thema mit em Gorbi lamentiern.



Doch daß der net mit jedem schwetzt, des is doch gonz klar;  
desweje is ja aach noch die Mauer da.  
Die Idee, in die sich de Rust hot verrannt,  
hot de Boche vun "Glasnost" wohl weit iwwerspannt.  
Doch was aus em werd, des steht in de Stern(e),  
vielleicht dut er in dene vier Johr im Lager wos lerne,  
daß, dodrum wo sich die Großmächt schun ewig long streite,  
dem konnste mit Flugkunststickscher koan Ende bereite.

Drum Kellner ...




Neilich ging ich mit moim Mädche am Schwarzbach entlang,  
do sagt ich zu mir:"Jetz schmeiße dich ran!"  
Ich nemm se in de Arm unn drick se gonz fest,  
do fragt se mich zärtlich:"Hoste iwverhaupt en Attest?"  
Ich denk, wos fürn Attest, wos fällt der donn oi,  
ich greif in die Tasch, zeig rer moin Führerschein.  
"En AIDS-Attest", hot se mer donn wild zugeraunt.  
"Wos en AIDS?", fragt ich ganz erstaunt.  
Wortlos legt se mer so en Ding für e Mark hie,  
debei hob ich doch e Gummiallergie.  
Ja, ihr Leit soin mer ehrlich, de Gummi is in,  
in jedem Automat unn sogar im Fernseh isser drin.  
Selbst moin kloane Bruder, des is net geloge,  
hot mit zwaa Grosche so e Ding ausm Automat rausgezoge.  
Ich mach hier moi Sprich, doch ihr Leit soin mer ehrlich,  
die Sach mit em AIDS is werklich gefährlich.  
Drum bleibt treu euerm Partner, des is aach net ohne,  
donn werd unser Kinstere die erste "AIDS-freie Zone!"

Drum Kellner ...

Neilich hot mer e Waschweib erzählt,  
doß se seit Longem zum Rhoi runnergeht  
mit ihrne gonze Hausarbeit -  
Mensch wos hot sich die Fraa gefreit.  
Denn seit die de gonze Dreck enoilaafe lasse,  
do spart die e Geld, du konnst es net fasse.  
Die braucht koan Pulver mehr für in die Wäsche,  
de Enkel koan Mittel mehr um zu erbreche  
unn die Filme vum Urlaub, du könnst dich bepisste,  
hot se zum Entwickeln ins Wasser geschmisse.  
Die dritte Zähn gleich hinnerher,  
die worn dann so sauber wie niemals vorher.  
Zum Bohnern zwaa Oamer uff die Fliese gekippt,  
demit es Herz net so flattert, nochmol dran genippt.  
Uff die Brieh, do wor die so versesse,  
do konnste "Doppelherz" grod mol vergesse.  
Unn als se es erste Mol erfolgreich Rhoiwasser getankt,  
hot se sich bei Herrn Sandoz persönlich bedankt.  
Do hot se im Auto gesesse unn gesunge,  
de Rhoi hoch unn runner is de Refrain mitgeklunge:  
Mit Sandoz, Geigy, Höchst AG  
werd dick unn fett doin Portmonee.

Ich hab den Vater Rhein  
in seinem Bett gesehn

Drum Kellner ...



Die Regierung in Hesse, die hot sich blamiert,  
de Joschka hot mit em Börner net harmoniert.  
De Börner war sauer uff soi Genosse,  
denn die Granate zum Abtritt kame vun de eigene Geschosse.  
Er wollt noch was rette, er hot sich gequält,  
doch die Regierungstage worn langst schun gezählt.  
Mer mußte neu wähle unn schun wars passiert,  
mer Hesse wern jetzte vun de Schwarze regiert.  
De Wallmann will die Sach jetzte schaukeln,  
mol gucke, wos die uns alles vorgaukeln.  
Vun Rot uff Schwarz hawwe sich die politische Farbe jetzt verännert,  
doch mir Kerweborsch finne des all voll behämmert,  
denn mir wisse, was jeder Kinsteerer weiß:  
In Kinstere gibt's nur unser Farbe - unn die soin ROT - WEIß.

Drum Kellner ...



Wie Ihr grod geheert hobt, in Hesse wurd gewählt  
unn korz druff in de gonz Republik es Völksche gezählt.  
Die Regierung hot sich sicher gedacht,  
wos de Augustus konn, könne mer aach - des wär doch gelacht.  
Es dritte Mol werd des jetz probiert  
unn des denke sich Leit aus, die hawwe studiert.  
Doch wie sagt mer so schee, wer zählt, der muß zahle,  
wos bei rauskimmt, sehe mer bei de nächste Wahle.  
Millione hawwe se aus em Fenster geschmissen,  
um wos zu erfahrn, wos sē längst schun dünawisse.  
Do werste gefragt, wie de hoaßt, wos de bist  
unn ob doi Lewwer oa vun de Gesündeste ist.  
Wie oft ich moin Badewasser benutz unn wozu,  
des geht eich nix oa - loßt mer moi Ruh.  
Schorsch Orwell hot's 48 schun gesagt,  
eines Tages wern mer all iwwerwacht.  
Volkszählung, Perso für in die Lesmaschin, so geht's Schlach uff Schlach,  
drum gebt acht, wos ich eich jetz sach.  
Es gibt schun e Moral aus unser Geschicht :  
Wer zuviel zählt, dem traue nicht.

Drum Kellner ...



Im scheene Kinstere, Ihr liewe Leit,  
 do geht die Großindustrie longsom pleit.  
 Denn do, wo frieher Kinsteerer Käs ging in die Welt,  
 do wern jetz Oafamilieheiser hiegestellt.  
 Mit em gute alte Oasiedelkäs  
 honn schun die Kinner gespeelt in de Schees.  
 Wos em Uwe Seeler soin Pitralon,  
 do longt uns en Handkäs mit Musik schon.  
 Kaum hoste in des Ding enoigebisse  
 hostes bei de Mädscher schun verschisse.  
 Doch wer's trotzdem schluckt, der iss en Gurmee  
 unn dut solche Kleinigkeit stolz iwwerseh.  
 Doch leider soin die scheene Zeite jetzte vorbei,  
 nun beginnt wirrer es Schmelzkäs - Oanerlei.  
 Traurig lege mer des Stick Geschichte ins Grab enoi  
 unn gründe en Handkäs - Revival - Veroi.

Drum Kellner schenk die Gläser voll Woi,  
 Kinsteerer Käs soll unser soi !



Wer hat denn den Käse zum Bahnhof gerollt ?

"Moi hoom is moi castel", des moane die Bridde,  
 aach in Kinstere is die Sach unbestritte.  
 Des dacht sich e Pärsche, es wor alles geplant  
 unn die Genehmischung vum Bauamt wor aach abgesahnt.  
 Die Hütt wor gebaut, es wor alles so schee,  
 doch uff's Klo muß mer jo aach emol geh.  
 De Hausherr wor de Erste uff'm Thron,  
 er mußt emol groß - des hot er devon.  
 Es Baue ging wohl doch e bisje schnell;  
 Käcke ohne Kanal is nix - gell !

Drum Kellner ...




Wos für's Fernseh die Lindestraß  
is für Risselsem die Opelgass.  
Errichte wollte se, ach isses net schee  
für's bessre Bild e Bauernallee.  
Unn gonz wie im Erste \*  
gab's Ärjer zum Zerberste.  
Planze wollte se große Linde,  
do motzte die Bauern: Des sieht doch en Blinde,  
doß wenn die Beem erst älter wern  
se beim Dorschfahrn mit em Drescher de Weg versperrn.  
Do verstande die Bauern iwwerhaupt koan Spaß  
unn flankierte en ganze Taach mit de Treckern die Gaß.  
Doch die Stadt kam mit 'ner Gärtnerkolonne  
unn korz druff hon die Beem schun gestonne.  
Genitzt hot's nix sich uffzureje,  
jetz misse se wohl doch die Trecker tieferleje.

Drum Kellner ...

\* Programm ( für die, die's net verstehn )

*„Siehste Schorsch, des' is die Lösung bei der  
Enge: ein Laufband vom Feld ins' Ort!“*




In de Odewoldstroß, mer wolle net lieje,  
wollt en Mann soi Kohle in de Keller noikrieje.  
Weil's besser geht, hot er sich gedenkt  
unn oafach emol es Kellerfenster ausgehängt.  
Doch er konnt net beginne, er konnt's grod verhacke,  
weil vor soim Fenster e Auto dut parke.  
Er läßt sich net lumbe unn stellt sich net dummm  
unn fährt mit soim Auto um de Block emol rum.  
Wirrer vor de Haustier oagekumme  
is soin Kellerfenster plötzlich spurlos verschwunne.  
Denn der gute Mann hot net bedacht,  
daß die Müllabfuhr ihr Arbeit macht.  
So longsom kam's em in de Sinn:  
Moi Fenster leit im Müllauto drin !  
Doch wie er aach schellt, uff die Drecksäck die alte,  
soin Fenster leit heit noch uff irgendner Halde.  
Ach guter Mann, hättste Öl statt Kohle  
dann det Dir die Stadt doin Fenster net hole.

Drum Kellner ...




Autos, Mebel annern Sache  
tun uff Messe Freude mache.  
Doch beim Bulldog un beim Plug  
is mit gucke net genuch.  
Ausprobiert wern muß es glei  
mer rammt de Plug in de Borem neu.  
Zackern, zackern, kreiz un quer  
mit viel PS des is net schwer.  
Doch es is grod wie verhext  
wo Gas strömt kein Gemüse wächst.  
Drum liewer Landwirt (Agrarökonom) nimm es heiter,  
de Agger umgrawwe is gescheiter.  
Unn wanns donn alloh net geht  
- die Ruhrgas AG hilft früh un spät.

Drum Kellner ...



Wer Kugeln stößt, der braucht ihn meist  
aus Beton einen Abwurf Kreis.  
Die Tonner hatte aach son Ding  
des longsom in die Brüche ging.  
Die daachte, en neije Kreis muß her  
in Handarbeit ist's halb so schwer.  
De neije, der war schnell gegosse  
fer de Schutt, wollte se die Stadt kumme lose.  
Doch en Nochber, ganz en schnelle  
war vor de Stadt an Ort un Stelle.  
Legt de Schutt in soin Schubkarrn neu  
un denkt es werd schun richtisch seu -  
wenn ich fort Fahr diesen Dreck  
un als die Stadt kam war er weg.  
Do hon se flugs - es soin jo koa Dumme,  
en Preßlufthammer mitgenumme.  
Sie hon gedacht de neije wer de alte  
un honnen in handische Stickscher geschpalte.  
Mer isses gewohnt so wie mer's sacht,  
die Stadt doch alles grindlisch macht (wennse was macht).

Drum Kellner ...




Zur Kerwezeit, weiß jedermann,  
doß en Kerweborsch net still soin kann.  
Unn wenn mer se gonz leis geheert,  
werd sich gleich gonz laut beschwert.  
Doch wenn's am Polterowend kracht  
unn Lumbepack Randale macht,  
do heer ich nix unn du nix seh,  
weil ich jo Ongst hob um moi Zäh.  
Unn dieser Bürger, der gemeint,  
uff den mer hier den Spruch gereimt,  
der fasse sich an seinen Schopf  
unn mach Gedanke sich im Kopf ( )  
Denn Kerweborsch dun laut zwar schrein,  
doch haun se koam die Zähne ein.

Drum Kellner ...

Umwelt, Fußpils, AIDS unn Wahle,  
de Leit ihr Freide unn ihr Quale,  
die hob ich eich hier vorgesetzt  
unn moi Maul gonz franzlich geschwetzt.  
Zum Schluß, ich will jo net lamentiern,  
awwer näxt Johr muß e Bisje meh passiern.  
Ob Fiewer, Koppeschmerz, Diarrhoe,  
im Saal, do isses immer schee.  
Drum loßt die Sorje Sorje soi  
unn trinkt mit uns paar Schoppe Woi.  
Ein Narr ist, wer es nicht erkennt,  
doß unser Kerb nur Freude schenkt.

Drum August hach jetz uff die Trummel  
unn weiter geht's im Kerwerummel !!



Die Kinsteerer Kerweborsch bedanken sich bei Herrn Walter Giesecke  
für die sehr gelungene Illustration des Kerwespruches .

# Kinsteerer Bär'n



Mir geh'n in de  
Kaisersaal zu de  
Kinsteerer Kerweborsch!